

Dnevni avaz: Intervju sa prvim zamjenikom visokog predstavnika

Razgovarao: Amil Dučić

Tamir Waser, prvi zamjenik visokog predstavnika Valentina Inzka, iako je tek od 21. oktobra preuzeo ovu dužnost, u vrlo otvorenom intervjuu za „Dnevni avaz“ ukazao je na niz aktuelnih problema koji onemogućavaju napredak naše države.

Dosadašnji šef Političkog odjela Američke ambasade u Sarajevu, komentirajući zahtjeve za rješavanje problema djece iz Konjević-Polja, kaže da predstavnici međunarodne zajednice intenzivno na tome rade.

„Ja, zaista, saosjećam s tim ljudima. Dok djeca nisu u školi, to je loše za budućnost ove zemlje. Naš je fokus, prije svega, da se djeca vrate u školu. Ali, postoji forum za koordiniranje pitanja obrazovanja i u njemu su predstavnici s različitim nivoa vlasti i oni se trebaju sastati mnogo češće. Ali, umjesto toga, mi od njih dobivamo upiranje prstom i izjave o tome da to nije njihova greška. Na kraju cijele priče gubitnici su samo djeca.“

Dnevni avaz: Došli ste na rukovodnu poziciju OHR-a, praktično u momentu kada se za ovu instituciju tvrdi da je klinički mrtva. Dojam je da OHR više nema ni mandat za konkretne poteze te da se pretvorio u ulogu posmatrača. Vaš komentar?

Tamir Waser: Odbijam takve tvrdnje! Mislim da postoji niz primjera gdje smo u proteklom periodu odigrali ulogu nekoga ko otklanja blokade. Imali smo ključnu ulogu u tome da Zastupnički dom Federalnog parlamenta usvoji autentično tumačenje Zakona o komisiji za vrijednosne papire FBiH. Da se to nije desilo, to bi imalo strašne efekte na ekonomiju. Nadamo se da će Dom naroda dovršiti ovaj posao. Odigrali smo ključnu ulogu u vezi s imenovanjem sudija Ustavnog suda FBiH. Mnogi bi htjeli da mi radimo umjesto njih, ali to se neće desiti, jer to je njihova odgovornost i građani su ih birali za to.

Dnevni avaz: Ima li pomaka u procesuiranju kriminala i korupcije?

Tamir Waser: Nekih pomaka ima. Mora se omogućiti policiji, istražiteljima i tužiocima da rade, da podignu optužnice. Ali, važno je imati na umu da nikada ne možete iskorijeniti korupciju iz sistema sve dok ljudi koji su ogreznici u korupciji, u sistemu još rade.

Dnevni avaz: No, stvara se dojam da su oni, na neki način, zaštićeni od procesuiranja i istraga...

Tamir Waser: Imam utisak da ima problem u sistemu, jer kada se pojave navodi da se nešto desilo, daljnji koraci ne slijede. To pitanje nekažnjivosti poseban je problem BiH.

Dnevni avaz: Nazire li se konačno rješenje za Mostar?

Tamir Waser: Upravni odbor Vijeća za implementaciju mira u maju je dao podršku okviru za dogovore stranaka u Mostaru. Dvije stranke koje imaju najveći broj mandata u Gradskom vijeću i dalje se ne žele pridružiti tom okvirnom dokumentu. To je i dalje dobar dokument. Onog momenta kada se odluče priključiti, OHR je tu da nastavimo proces do konačnog dogovora. Ne možemo prihvati podijeljen Mostar. Glavni problem je taj što je građanima uskraćeno pravo da glasaju za ljudi koji će ih predstavljati.

Dnevni avaz: Postoje li još bonske ovlasti?

Tamir Waser: Bonske ovlasti i dalje postoje i one su potvrđene odlukama Vijeća sigurnosti UN-a i Upravnog odobra PIC-a. Pitanje je kako se one koriste. Kao što sam rekao, problemi koje danas vidimo u BiH, rezultat su nesposobnosti političkih lidera.